

# Austria – ils rapports dal Grischun cun las pussanzas europeicas

■ Il term Austria designescha dapi il reginavel da l'imperatur Otto III in contadi da cunfin (tudestg Mark/Grenzmark) creà da Carl il Grond. Il 1156 è quel contadi daventà in ducadi, transferì il 1278 al domini dals Habsburgais ch'han purtà il titel d'imperators d'Austria dal 1804–1918. Il 1920 è vegnida constituida la Republica federala d'Austria ed il 1945 sia successura, la Republica d'Austria.

## Relaziuns politicas

Il Vnuost, il Vorarlberg ed il Tirol èn daventads l'onn 20 s.C. parts da la provinza romana Raetia. La fixaziun posteriura dal cunfin Brenner/Raisch ha destrui l'unitad preistorica e romana Rezia-Tirol. En il temp medieval tempriv èn il Vnuost ed il Vorarlberg – reunids en il contadi dal Vnuost che cumpigliava era la Val Müstair e l'Engiadina Bassa – stads sut il domini territorial ed ecclesiastic da l'uestg da Cuira. Il 1363 è il Vnuost passà sco ducadi dal Tirol als Habsburgais. L'impurtanza strategica dals pass retics per la politica imperiala e per l'administraziun habsburgais-tirolaisa sesenta a Puntina ha determinà da tuts temps las relaziuns tranter il Grischun e l'Austria. Già il 1283 ha Rudolf, l'emprim retg habsburgais, furmà dals relicts dal vegl contadi retic il Contadi liber da Lags ed ha prendì quel sco feud da famiglia. A la smanatscha creschenta da l'ost tras ils Habsburgais ha Donat de Vaz fatg frunt cun sustegnair il 1313 Ludwig von Bayern en il cumbat cunter Habsburg per la curuna imperiala e cun cumbatter il 1323 da la vart dals Confederads cunter Habsburg e lur allià, l'uestg da Cuira (cumbats en il Dischma ed a Filisur) ed il 1333 cunter Habsburg e l'avat da Mustér (cumbats sin l'Alpsu). Uschia ha Donat de Vaz pudì impedir la constituziun d'in stadi territorial habsburgais-retic. Suentèr l'acquist dal contadi dal Tirol e, pauc pli tard, dal Vorarlberg tras ils Habsburgais, ha la Lia da la Chadé, fundada il 1367, impedì lur expansiun vers il vest. Dal 1421–1803 ha l'Austria possess l'avugadia sur la claustra da Müstair. Il 1464 ha la Chasa Habsburg-Austria acquistà il signuradi da Tarasp e dretgs giudizials en l'Engiadina Bassa e la Val Müstair e già il 1475 ha la Guerra da las giaglinas, provocada tras il refus da pajar tribut en furma da la giaglina da tschaiver, chaschunà miseria en l'Engiadina Bassa. Las relaziuns giuridicas èn restadas ordvart cumplitgadas en quella regiun (convivenza tranter libers e subdits a la giurisdicziun da la Chadé da Cuira resp. a quella dal contadi dal Tirol). Il 1470 han ils von Habsburg cumprà las sis dretgiras da Tavau, Claustra, Pralung, S. Peder, Curvalda e Belfort dals conts de Montfort-Tettnang ed il 1496 Aschera e Castels dals baruns de Matsch. Quellas uschenumnadas Otg Dretgiras han furmà (de facto) ina podestataria austriaca fin il 1649. Ma quella regiun era per l'Austria atgnamain mo d'interess politic-territorial e betg economic.

Il 1497 ha l'Austria acquistà dals conts de Zollern tras barat il signuradi da Razén ed è qua tras daventada in dals signurs da la Lia Grisca cun dretg da proponer mintga trais onns il chau-lia. La Guerra svabaisa dal 1499 (battaglias a la Chalavaina ed al Pass Son Gliezi) ha mess in term a l'expansiun territoriala austriaca en il Grischun. La Pasch da Basilea (1500), il Contract da Feldkirch (1503) e la Cunvegna dal 1518 han servì da basa a las relaziuns tranter il Grischun e l'Austria fin als Scumbigls grischuns. L'acquist da la Vuclina e dals contadis da Buorm e Clavenna (1512) han avert als Grischuns la via a Vaniescha ed han rendì las Lias interessantas era per las pussanzas grondas (Austria, Spagna, Frantscha), implitgadas en il cumbat per la



La citad barocca da Vienna l'onn 1758.

Lumbardia. Partidas e faciuns han decidì da qua davent la politica da las Lias e da tut las varts fluivan pensius e daners a favur da las dretgiras, da las vischnancas e da la signuria dominante (daners da corrupziun). En il 16avel e 17avel tschientaner era in ambassadur ordinari u extraordinari austriac adina preschent a las Dietas da las Lias ed en il 18avel tschientaner residava in tal permanentmain en il Grischun.

Ils Artitgels da Glion dal 1526 han empruvà, cun in tschert success, d'impedir u diminuir l'influenza da l'Austria tras l'exclusiun da Na-Grischuns da la tscherna da l'uestg (permess mo cun consentiment da la Lia da la Chadé). La decisiun concernent la confessiun ha cumpromess suenter il 1526 las relaziuns tranter l'Austria e la Republica da las Trais Lias respectivamain tranter las Lias e las Dretgiras ed ha schendrà ulteriuras faciuns internas. Ils conflicts d'interess (venals) han provocà per finir ils Scumbigls grischuns, en ils quals l'Austria ha giugà dapi l'invasiun dal 1621 ed il Capitulat da Lindau dal 1622 (in dictat) ina rolla dominante e repressiva. La Republica grischuna era da quel temp ina provinza militar da l'Austria sin il precint da sa schliar ed enturn il 1630 ha ella stuì supportar perfin ina terza occupaziun tras l'Austria, avant l'expulsiun dals Austriacs e Spagnols da la Vuclina (1630) tras il «bun duca» de Rohan. En il Capitulat da Milaun dal 1639 ha la Spagna-Milaun puspè restitui las Terras subditas a la Republica da las Trais Lias; l'Austria ha confermà quest possess il 1641/42 en il Contract da Feldkirch. La Pasch da Vestfalia (1648) ha sigillà la separaziun totala da las Lias da l'Imperi austriac (ils Habsburgais purtavon la curuna imperiala). Las Otg Dretgiras (1649–52) e l'Engiadina Bassa (1652, senza Tarasp) èn alura sa cumpradas libras da l'avugadia austriaca. A la dominanza da la diplomazia spagnola en il 17avel tschientaner, respeschentada dals ambassadurs Casati, è suandada quella da l'Austria sco possessura dal ducadi da Milaun dapi il 1706. Per quel motiv è vegnì contractà il Segund Capitulat da Milaun cun l'Austria (quel dal 1639 cun la Spagna). Il profit economic da quel è stà modest ed il Grischun ha ultra da quai stuì acceptar l'elecziun dal Tirolais Joseph Benedikt von Rost sco uestg da Cuira (1728) e l'expulsiun dals reformads da las Terras subditas (1729). La Val Müstair, vendida a l'Austria tras l'uestg (1728/34), è ve-

gnida reacquistada il 1762. Il privel d'ina alianza dal Grischun cun Vaniescha ed (en quest connex) il plan da schlargiar la via sur il Pass da S. Marc han manà al Terz Capitulat da Milaun (1763). A las (per se) bunas cundiziuns per il Grischun è suandada la catastrofa: Vaniescha ha decretà l'expulsiun da tut ils Grischuns da ses territori. Per quai che reguarda l'emigraziun commerciala ha l'Austria giugà ina rolla subordinada en confrunt cun il rest da l'Europa, ma impurtanta per l'emigraziun stagiunala. La nauscha raccolta dal 1793 e la bloccada dal graun, adossada da l'Austria cunter il Grischun, han provocà a medem temp la sullevaziun e la dretgira nauscha dal 1794 cunter l'oligarchia «austriaca» dals Salis e Baviers. Anticipond l'invasiun dals Franzos, han truppas austriacas occupà il Grischun l'october 1798 per segirar ses possess e ses dretgs. Ils Austriacs èn vegnids rebattids il 1799, els han dentant installà a Cuira ils 22 da matg 1799, suenter ina cunter-offensiva reussida, la Regenza interimala («austriaca»), presidiada dad Anton von Salis-Soglio, e deportà ils manaders da la partida «franzosa» a Puntina. Ils 15 da fanadur 1800 è quella fugida a Zernez, alura a Meraun. Il 1803 ha l'Acta da mediaziun privà l'Austria da ses dominis e dretgs en il Grischun. Durant la Sullevaziun tirolaisa dal 1807 ha il Grischun furnì armas da cuntribanda als rebels dad Andreas Hofer. En il Montafun ed en il Klostertal existiva già dapi l'entschatta dal 19avel tschientaner in moviment per l'uniun territoriala cun il Grischun; quel è puspè daventà actual il 1919, cura ch'il Vorarlberg ha votà per l'uniun cun la Svizra (Felix Calonder aveva promovì quella). A l'Austria èn vegnids cedids tras l'uschenumnada Incameraziun (1809) ils possess da las claustras da Müstair e da S. Gliezi/Cuira sco era quels da l'uestg da Cuira, situadas en il Tirol ed en il Vorarlberg ed ils radund 80 000 catolics èn vegnids incorporads en l'uestg da Brixen. Il Congress da Vienna ha alura accordà il 1815 al chantun Grischun la suveranità cumplaina entaifer ses territori; en barat ha l'Austria survegnì las anteriuras Terras subditas (Vuclina, Buorm e Clavenna) e las parts sin territori austriac èn vegnidas separadas definitivamain da l'uestg da Cuira. Il problem da la Confisca e las intervenziuns diplomaticas en connex cun ils fugitivs politics en il Grischun (Wilhelm Snell, Karl Follen, Karl Völker e.a.) han engrevgià las relaziuns tranter il chantun Grischun

e l'Austria fin enturn il 1840. La Constituziun federala dal 1848 ha terminà l'autonomia (parziala) dal Grischun en fats da politica exteriura. Il 1868 èn vegnids fixads ils cunfins tranter l'Engiadina Bassa e Finstermünz en l'Austria ed il 1902 quels cun il Paznaun.

## Relaziuns militaras

En cumparegliazion cun la Frantscha èn quellas stadas marginalas. Fin en il 18avel tschientaner ha l'Austria recrutà mo ina giada schuldada en il Grischun: vers la fin dal 17avel tschientaner han battì probablmain pliras cumpagnias grischunas en il regiment da Bürkli cunter ils Tircs e Franzos. Il 1704 ha ina capitulaziun (contract militar) permess a l'Austria da recrutar 800 schuldads, il 1708 anc ulteriurs 800 per il regiment comandà da Johann Anton Buol von Schauenstein. Il 1735–38 han dus battagliais battì per l'Austria en la Guerra da successiun cunter la Pologna sut il cumond dal colonel e cont Thomas Franz von Schauenstein. Il 1739 han 2 400 Grischuns cumbatti sut il barun Ulrich Buol von Strassberg per Maria Theresia; suenter la relaschada da quels il 1750 n'han ils Austriacs betg pli recrutà schuldads en il Grischun, cun excepziun dals 100 guardians da la Hofburg. A l'Austria han servì fin en il 20avel tschientaner, ultra dals surnumnads, tranter auter era il feldmarschal litinent Herkules von Pestalozzi, Arthur von Sprecher e Daniel von Salis-Soglio.

## Relaziuns economicas

Il transit da martganzia, l'export da laina, muvel u chaschiel e la dependenza da l'import da graun, ris u sal han pretendì relaziuns amicablas u almain supportablas cun l'Austria sco pajais vischin ed era cun la curuna da Habsburg-Spagna e cun l'Austria sco regents dal ducadi da Milaun avant il 1706 (lingia spagnola) respectivamain suenter (lingia austriaca). Ils Capitulats da Milaun han promovì l'economia grischuna, els han dentant era exponì il Grischun dapi il 17avel tschientaner a la repressiun politic-economica dals partenaris. D'ingina impurtanza per l'agricultura grischuna èn stads fin a l'Emprima Guerra mundiala ils praders dal Montafun e dal Paznaun (forzas da lavur temporaras), l'hotellaria ha profità dapi il 20avel tschientaner dal personal d'hotel da l'Austria.

## Relaziuns culturalas

Il Montafun, il Vnuost ed il Vorarlberg (vischins da cunfin) appartegnan al vegl territori retic-rumantsch ed han convivi durant 1000 fin 1500 onns era culturalmain cun la Rezia grischuna. Els èn – sco il Grischun – stads pertutgads da la germanisaziun tras Gualsers (derivants per part dal Grischun) ed Alemans da la regiun dal Lai da Constanza. La lingua rumantscha ha persistì en il Montafun e Vorarlberg fin viaden il 15avel tschientaner, alura è ella sparida suenter ina lunga fasa da bilinguitad sut pressiun linguistica dals Alemans dal nord e dals Gualsers. En il Vnuost ha il rumantsch pudì resister fin viaden il 16avel e 17avel tschientaner ed è alura daventà – sco lingua dals Ladins reformads – victima oravant tut da la cuntrareforma catolica. Survivi ha il rumantsch en ils nums da cultura, ma la punt linguistica cun ils Ladins da las Dolomitas è stada interrutta. Dapi il 1386 èn attestads students grischuns a Vienna (università), dapi il 1650 a Feldkirch (gimnasi dals gesuits) ed a partir dal 1671 a Puntina (università), nua ch'ins ha fundà il 1931 la Cuminanza da perscrutaziun alpina per studiar ils dialects da tut las regiuns da las Alps ed installà il 1965 in lectorat per rumantsch. Dapi ca. dus decennis s'intenseschan ils contacts persunals e culturals tranter l'Engiadina Bassa e la Val Müstair cun il Vnuost. A Cuira è domicilià il Consulat onurari austriac per la Svizra.

Adolf Collenberg

## Vienna

La citad da Vienna era in dals centers da l'emigraziun grischuna en l'uschenumnada Monarchia austroungaraisa. L'Universitad da Vienna era da grond'impurtanza per la scolaziun umanistica. La pli part dals students grischuns dal temp medieval tardiv derivava da Cuira e da l'Engiadina. Dals 112 students attestads en il 15avel e 16avel tschientaner (glista incumpletta) èn blers daventads pli tard reverendas e/u notars. Il 1627 ha concedì il papa Urban VIII a students «da la Rezia» duas plazzas da studi en il collegi da S. Barbara.

Ils emprims fastizs d'ina activitad commerciala da Grischuns a Vienna dateschan dal 1580: ils Pestalozzis da Cuira, suandads dals Molinaris, Zanchonis, Castelmurs, Picononis ed il 1618, suenter la destrucziun da Plür, dals Giulinis e Lumagas. La preschientscha da pastiziers e cafetiers grischuns a Vienna n'è mai stada gronda, percurter han dominà ils maisters spazzachamins e lur suita mesolcinaisa durant radund trais tschientaners questa sparta en la chapitala austriaca. Ils spazzachamins da Vienna eran organisads en ina corporaziun pussanta, dirigida en ils onns 1775–1860 quasi exclusivamain da maisters da Soazza e da Roveredo. L'Emprima Guerra mundiala ha sigillà il declin era da las interpresas grischunas. Sco a Paris han blers Grischuns era servì en il regiment da guardia a Vienna. Ils dretgs suverans da Habsburg/Austria en il Grischun (Razén, Otg Dretgiras, e.a.) èn vegnids exequids davent da Puntina (e betg da Vienna).

Adolf Collenberg

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.